





# Акафист святому праведному Василию Павлово-Посадскому

## Кондак 1

Избранный угодниче Христов и правыя веры ревнителю, восхваляюще богоугодное житие твое, с любовию почитаем тя. Ты же, яко имея дерзновение ко Господу, от всяких нас бед свободи и благая твори настави, да зовем ти: Радуйся, Василие, милостивый наш заступниче.

## Икос 1

Ангелов Создатель избра тя, святе Василие, яко вернаго служителя Своего, измлада восприемшаго начатки доброделания и молитвы. Князь же мира сего потщася погубити тя. Ты же, отче, от Бога вразумленный, слезами покаяния душу от скверны греховныя омыл еси и житием богоугодным просиял еси, сего ради вопием ти:

Радуйся, от родителей благочестивых рожденный;

радуйся, добродетели теми наученный.

Радуйся, во отрочестве кротость и послушание явивый;

радуйся, от лет младых святыя книги возлюбивый.

Радуйся, во искушениях юности от Бога не отвративыйся;  
радуйся, внезапною кончиною богохульника вразумивыйся.  
Радуйся, покаянием с Богом примиренный;  
радуйся, правья веры ревнителю кроткий и смиренный.  
Радуйся, Василие, милостивый наш заступниче.

### **Кондак 2**

Видя человеколюбивый Владыка твоего сердца искреннее покаяние, призва ты ко обители Никольстей, идеже, от чудотворнаго образа Спасова исцеление уллучив, радостно воспел еси Богу: Аллилуиа.

### **Икос 2**

Разума Божественнаго взыскуя, мудрейших себе вопрошал еси, праведне Василие. Темже благоразумному совету старца Венедикта, еже в мире жити и Церковь от неправых учений защищати, последовал еси. Мы же послушание твое восхваляюще, вопием ти сие:  
Радуйся, мытареву покаянию подражавый;  
радуйся, плачем сокрушенным грехи своя омывый.  
Радуйся, страх Божий в сердце твоём стяжавый;  
радуйся, о Суде Божиим людем возвещавый.

Радуйся, наставление мудраго пастыря  
смиренно приемый;  
радуйся, святым отцем в житии последовавый.  
Радуйся, Пречистыми Тайнами душу твою  
напитавай;  
радуйся, единому Господу и Церкви Его  
работати возжелевый.  
Радуйся, Василие, милостивый наш заступниче.

### **Кондак 3**

Сила Вышняго укрепи тя к исполнению словес  
апостольских, сего ради вседушно потщался еси  
похотей плотских отвращатися, очи горе  
устремляти и гордость житейскую любовью к  
Отцу Небесному препобеждати. Темже помози  
нам исполнити заповеди Христа Бога, Емуже  
поем: Аллилуиа.

### **Икос 3**

Имея попечение о пользе ближняго, противостал  
еси кознем диавольским, святе Василие, и, яко  
доблий воин Христов, клевету и поношения  
смиренно претерпевая, многия заблуждшия  
души, расколом уязвленные, во ограду  
церковную привел еси. Мы же, труды твоя  
зряще, восхваляем тя сиче:  
Радуйся, благодатию Духа Святаго  
просвещенный;  
радуйся, в броню правды Божия оболченный.

Радуйся, свет веры Православных людей  
явивый;

радуйся, многия от раскола к Церкви  
обративый.

Радуйся, Бога и ближнего нелицемерно  
возлюбивый;

радуйся, суетныя увеселения презирати  
научивый.

Радуйся, во искушениях твердость веры и  
упования показавый;

радуйся, добродетельным житием твоим Бога  
прославивый.

Радуйся, Василие, милостивый наш заступниче.

#### **Кондак 4**

Бурю нашедших на тя искушений кротко  
претерпевая, святе Василие, незлобием и  
нелицемерным благочестием многая окаменелая  
сердца умягчил еси. Темже и раб Христов благий  
и верный от всех познался еси. Мы же,  
восхваляюще Бога, дивнаго во святых Своих,  
поем Ему: Аллилуиа.

#### **Икос 4**

Слышаще людие доброе твое житие, притекаху к  
тебе, угодниче Христов, совета и утешения в  
нуждах просяще. Ты же, монашескаго жития  
взыскуя, сердцем смущался еси, обаче, явлением  
святаго Харалампия наставленный, попечение о

душах, во ограду Церкви возвращенных,  
возымел еси. Сего ради ублажаем тя тако:  
Радуйся, скорый помощниче к тебе  
прибегающим;  
радуйся, добрый утешителю страждущим.  
Радуйся, мудрый советниче добродетельнаго  
жития взыскующим;  
радуйся, теплый молитвенниче, лютыя болезни  
прогоняющий.  
Радуйся, душеполезный собеседниче людей  
благочестивых;  
радуйся, крепкий защитниче бедных, убогих и  
сирых.  
Радуйся, воли Господни усердный исполнителю;  
радуйся, обратившихся от раскола мудрый  
врачевателю.  
Радуйся, Василие, милостивый наш заступниче.

### **Кондак 5**

Богосветлую звезду, ко Христу приводящую,  
познаша тя благочестивии людие, Василие  
праведне, и просвещаеми светом твоим,  
шествоваху путем Господних заповедей,  
прославляюще Бога и поюще Ему: Аллилуиа.

### **Икос 5**

Видев Иаков, купец богобоязненный,  
добродетельное житие твое, святе Василие,  
ввери себе твоему совету и постави тя

управителя имения своего. Ты же, попечение о мире, пользе душевной и благоденствию труждающихся имея, образ мудраго правления показал еси. Сего ради прославляем тя тако: Радуйся, тесным и претрудным путем шествовати научаяй;

радуйся, всякое дело во славу Божию творити призываяй.

Радуйся, бедных и немощных утешаяй;

радуйся, богатых человеколюбием научаяй.

Радуйся, страстями обуреваемых тихое пристанище;

радуйся, в скорбех пребывающих скорое утешение.

Радуйся, Богу всегда благодарение приносивый;

радуйся, благословение Отца Небеснаго стяжавый.

Радуйся, Василие, милостивый наш заступниче.

### **Кондак 6**

Проповедник премудр явился еси, отче Василие, люди наставляя, яко несть беда скорби мира сего претерпевати, обаче скорбь велия есть веру православную оставити и житие христианское погубити. Сего ради взываем ти: моли Бога о нас, грешных, да укрепит нас Господь веровати в Него и заповеди Его соблюдать, да всегда зовем: Аллилуиа.

## **Икос 6**

Возсиял еси людем страждущим, отче праведне, яко новый Филарет Милостивый: егда бо тленное богатство уллучаше, не прилагал еси тому сердце твое, но щедро убогим раздавал еси и всем, просящим, вспомоществовал еси. Сего ради, прославляюще милосердие твое, вопием сице: Радуйся, путь служения Богу и ближним избравый; радуйся, богатством земным сокровища небесная стяжавый. Радуйся, девства и чистоты ревнителю; радуйся, молитвы и воздержания учителю. Радуйся, о благолепии храмов и обителей попечение имевый; радуйся, уставы церковныя усердно хранивый. Радуйся, наипаче Царствия Небеснаго взыскавый; радуйся, Господа всем сердцем возлюбивый. Радуйся, Василие, милостивый наш заступниче.

## **Кондак 7**

Хотя святитель Филарет рану душепагубнаго раскола уврачевати, обитель Преображенскую в веси Гуслицкой устрои, и ты, отче, яко мужа праведна, имети попечение о той благослови, да многия люди паки чада Церкви соделаются и Богу воззовут: Аллилуиа.

## **Икос 7**

Новую возжелал еси обитель создати в Посаде Павловстем, святе Василие. Аще и братию собрал еси и начало трудом положил еси, обаче не свершися дело сие при жизни твоей. Последи же молитвами твоими воздвижесе обитель во имя Покрова Пречистыя Богородицы, идеже и святыя мощи твоя упокоишася. Мы же, ревность твою о славе Божией восхваляюще, вопием сице:

Радуйся, благая семена жития монашескаго в Посаде Павловстем насадивый;  
радуйся, плоды доброделания тамо возрадивый.

Радуйся, чистоты и трезвения проповедниче;  
радуйся, послушания воли Божией наставниче.  
Радуйся, крепкую веру во всемогущий Промысл Божий явивый;  
радуйся, ненавидящая тя по заповеди Христовой возлюбивый.

Радуйся, злоречие враждующих на тя с кротостью и незлобием терпевый;  
радуйся, благодатный дар плача о гресех стяжавый.

Радуйся, Василие, милостивый наш заступниче.

## **Кондак 8**

Странное для сынов века сего возвещал еси блаженство, праведне Василие, воспоминаая

слова Писания: блажен муж, ему же не вменит Господь греха, паче же блажен, в его же устах не обретается лъсть. Научи и нас, отче, приносити достойныя плоды покаяния и храни язык от словес неправедных и лукавых, но во умилении воспевати Богу: Аллилуиа.

### **Икос 8**

Весь в молитве пребывая и благими деяньми Богу служа, святе Василие, дар исцеления от Господа приял еси. Тем же, приходящих к тебе елеем от лампады помазуя и тяжкия недуги врачуя, всех к усердней молитве призывал еси. Мы же, предстателя тепла пред Богом тя ведуще, зовем таковая:

Радуйся, призывая храни уста от празднословия;

радуйся, научая нас отвращатися клеветы и злословия.

Радуйся, ходатайством твоим чтущия тя не оставляя;

радуйся, к молитве усердней нас призывая.

Радуйся, крине добродетелей благоуханный;

радуйся, сосуде благодати Богом избранный.

Радуйся, житием твоим путь ко Господу указуя;

радуйся, благодатию Духа Святаго недуги врачуя.

Радуйся, Василие, милостивый наш заступниче.

## **Кондак 9**

Всякое помышление в болезнях телесных ко Господу устремляя, из глубины сердца твоего, святе Василие, псаломски взывал еси: Ты еси Прибежище мое от скорби обдержажия мя; Радосте моя, избави мя от обышедших мя. Прославляюще всецелое упование твое на Господа, поем Ему: Аллилуиа.

## **Икос 9**

Ветии многовещаннии не возмогут по достоянию изглаголати тайныя подвиги о Бозе тобою содеянныя, праведне Василие. Мы же, дивящися смирению, терпению и упованию твоему на Господа в тяжких телесных недужех твоих, зовем сице:

Радуйся, во страданиях телесных славословие Богу приносивый;

радуйся, молитвы о себе у ближних со смирением просивый.

Радуйся, терпение во искушениях, яко дар многоценный, стяжавый;

радуйся, все упование на премудрый Промысл Божий полагаваый.

Радуйся, в скорбех на милость Божию надежду не оставивый;

радуйся, во всяком обстоянии благодарение Богу возносивый.

Радуйся, своевольная желания отсекаати

наставляяй;  
радуйся, плотское мудрование духу повиновати  
научаяй.  
Радуйся, Василие, милостивый наш заступниче.

### **Кондак 10**

Спасти хотя душу твою, угодниче Христов, тако  
взывал еси: Иисусе Сладчайший! Просвети  
мысли моя сердечныя и даждь ми память  
смертную. Ныне же, во Царствии Небеснем  
предстоя престолу Божию, молися о нас  
грешных, да и мы, памятующе о кончине своей,  
очистим души покаянием и в радости воспоем  
Богу: Аллилуиа.

### **Икос 10**

Царя Небеснаго возлюбив всем сердцем,  
праведне Василие, и провидя приближение  
исхода твоего, все упование возложил еси на  
Него, сие взывая: Ты еси, Иисусе, Надежду в  
смерти моей и Животе по смерти, и утешение на  
Суде Твоем. Темже, ублажающе праведную  
кончину твою, со умилением вzywаем:  
Радуйся, со страхом Божиим время жития  
твоего проводивый;  
радуйся, любовь ко Христу деланием заповедей  
Его явивый.  
Радуйся, память смертную во уме стяжавый;  
радуйся, имя Сладчайшаго Иисуса в сердце

носивый.

Радуйся, Бога всею душою и всем помышлением  
возлюбивый;

радуйся, Ему единому в мире сем  
скоропреходящем служивый.

Радуйся, угодниче Божий, ныне со всеми  
святыми пребываяй;

радуйся, молитвенниче усердный, на нас,  
грешных, милосердие Божие призываяй.

Радуйся, Василие, милостивый наш заступниче.

### **Кондак 11**

Пение похвальное приносим ти, праведне  
Василие, яко и по отшествии твоём не  
оставляеши нас, чад твоих, но избавляеши от  
всяких бед и зол, подавая исцеления всем, к  
раце мощей твоих притекающим. Темже,  
радуящиеся, прославляем прославльшаго тя  
Господа, вопиюще Ему: Аллилуиа.

### **Икос 11**

Светом добродетельнаго жития твоего сияя,  
монашествующим и мирским путь ко спасению  
указал еси, блаженне. Темже и по смерти твоей  
нас, грешных, наставляеши искати Царствия  
Божия и правды его и во всем повиноватися  
закону Христову. Сего ради взываем ти сице:  
Радуйся, по отшествии твоём ко Господу нас не  
оставляяй;

радуйся, страждущих от недугов  
многообразных избавляяй.

Радуйся, мать со чадом, у гроба твоего  
молящихся, от неисцельнаго недуга  
уврачевавый;

радуйся, девицу от болезни главныя избавивый.

Радуйся, отроковицу согбенную от недуга  
исцеливый;

радуйся, глухой девице слух возвративый.

Радуйся, неверующих в праведность твою мудре  
вразумивый;

радуйся, многими чудесы от Господа  
прославляемый.

Радуйся, Василие, милостивый наш заступниче.

### **Кондак 12**

Благодатию всещедрого Бога посрамишася  
людие нечестивии злобне оклеветающии имя  
твое, егда лютое гонение воздвижеся на Церковь  
Православную. Но яко прах, егоже возметает  
ветр от лица земли, разсыпашася лукавыя  
наветы их и возсия память твоя по всей земли  
нашей. Мы же, ведуще тя молитвенника тепла  
пред Богом, поем Ему: Аллилуиа.

### **Икос 12**

Поюще труды и подвиги твоя, ликовствуем,  
праведне Василие, яко чудное дарование от  
Господа явися Посаду Павловскому во

обретении честных мощей твоих. Темже,  
величающе прославльшаго тя Господа,  
похвальная тебе приносим:

Радуйся, во обители, молитвами твоими  
устроенней, благоговейно почитаемый;  
радуйся, в земли Московстей светло  
прославляемый.

Радуйся, яко яви Господь в день прославления  
от мощей твоих дивное благоухание;  
радуйся, о Бозе с любовью приемляй наша  
молитвы и воздыхания.

Радуйся, людей, притекающих к мощем твоим,  
от тяжких недугов свободяяй;  
радуйся, жены неплодныя, с верою молящияся  
тебе, от бесчадия избавляяй.

Радуйся, праведниче, возлюбивый молитву,  
милосердие и смирение;  
радуйся, верный сыне Церкви Христовы,  
обретый вечное спасение.

Радуйся, Василие, милостивый наш заступниче.

### **Кондак 13**

О, преславный угодниче Божий, святой  
праведный Василие! Приими сие малое моление  
от нас, недостойных, с верою и любовью тебе  
приносимое. Испроси нам у Господа Бога  
покаянием грехи наша омыти, скорби, к пользе  
нашей попускаемья, с терпением носить,  
наипаче же смирение, любовь к Богу и ближним

стяжати, да сподобимся с тобою воспевати  
Пресвятей Троице: Аллилуиа.

Этот кондак читается трижды, затем икос 1-й и  
кондак 1-й.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НУЖЕ  
НЕБО**